

UMSÖGN

Viðtakandi: Forsætisnefnd

Sendandi: Stafrænt ráð

Efni: Umsögn um aðgerðaráætlun Reykjavíkurborgar 2024-2026 um þátttöku í alþjóðlegum rannsóknar- og nýsköpunarverkefnum

Vísað er til bréfs, dagsett 6. mars 2024, þar sem óskað er eftir umsögn frá stafrænu ráði um aðgerðaráætlun Reykjavíkurborgar 2024-2026 um þátttöku í alþjóðlegum rannsóknar- og nýsköpunarverkefnum.

Stafrænt ráð tekur undir niðurstöður Stofnunar stjórnsýslufræða og stjórn mála (SSS), og helstu aðgerðir sem lagðar eru fram í fyrirliggjandi drögum að aðgerðaáætlun.

Stafrænt ráð tekur sérstaklega undir að nauðsynlegt sé að verkefni séu hýst á því sviði eða skrifstofu sem sjálf vinnan tengist helst, það felur m.a. í sér ábyrgð á fjárhagslegu utanumhaldi og eftirfylgni verkþátta. Þannig er stuðlað að því að sú sérþekking og reynsla sem þar er fyrir hendi nýtist og rati inn í stefnur fagsviða og aðgerðaráætlanir sem styður við stöðugri uppbyggingu þekkingar og bætingu á þjónustu til íbúa.

Til viðbótar við þær tillögur sem lagðar eru fram væri einnig tækifæri til að efla þverfaglegt rannsóknar- og nýsköpunarstarf með því að tengja sérfræðinga á sviðum og skrifstofum saman í teymi sem bæri ábyrgð á að leiða þessa vinnu. Teymið hefði m.a. það hlutverk að halda utan um samræmingu markmiða, uppbyggingu áskoranabanka í tengingu við stefnur borgarinnar, vöktun og eftirfylgni með árangursmælingum.

Með þessum hætti væri hægt að samræma starfið inn á við og efla samstarf út á við við önnur sveitarfélög, borgir erlendis, stofnanir, ríkið og aðila á markaði. Þá væri upplagt að hefja samtal við háskólasamfélagið um miðlægan klasa og tilraunasvæði innan Vísindagarða með áherslu á samsköpun, rannsóknir og þróun við þeim samfélagslegu áskorunum sem að okkur steðja.

Þátttaka Reykjavíkurborgar í alþjóðlegum rannsóknar- og nýsköpunarverkefnum hefur verið dýrmæt og skilað sér í bættri þekkingu, öflugri nýsköpunarmenningu, bættum tengslum við borgir, stofnanir og nýsköpunarsjóði. Stafrænt ráð tekur undir nauðsyn þess að raunera þá reynslu og þekkingu sem áunnist hefur með breytingum á fyrirkomulagi þessara samstarfsverkefna. Til framtíðar þarf að tryggja samfellu í þeirri þekkingu sem byggst hefur upp með hverju verkefni til að fyrirbyggja að þekking glatist ef bil verða til í tímalínum verkefna.

Í grunninn er mikilvægt að innleiða betri umsýslu og skýrari ferla fyrir umsóknarferli styrkja, rekjanleika í fjársýslu verkefna og uppgjör styrkja. Styður ráðið þá tillögu að bæta stjórnábylgju umsýslu umsókna til að tryggja að þær séu í takti við þarfir borgarinnar og að leitað sé til aðila eins og Rannís og annarra reynslumikilla aðila. Þá er mikilvægt að nýjar verklagsreglur verði vel kynntar starfsfólki þannig að m.a. allir fjármálastjórar séu vel upplýstir og lögfræðingar fagsviða og borgarlögmaður komi að öllum samningum sem eru gerðir, ásamt því að tillögur að umsóknum séu teknar fyrir í viðeigandi fagráðum.

Að lokum bendir stafræna ráðið á að í bígerð er að setja í gang stefnumótunarvinnu á haustmánuðum 2024 sem snýr að opinberri og samfélagslegri nýsköpun, sem ofangreint framtíðarskipulag rannsóknar- og nýsköpunarverkefna fellur undir. Þá telur ráðið mikilvægt að stafræna ráðið sé einnig haft með í ráðum sem sá pólitíski vettvangur, ásamt forsætisnefnd, þar sem m.a. áhugaverð köll, lykiláskoranir, umsóknir og framvinda verði kynnt hjá.

F.h. stafræns ráðs,

Alexandra Briem,
formaður